

Innviðaráðuneytið  
bt. skrifstofu samgangna

Reykjavík, 20. janúar 2023

### Umsögn um reglugerðardrög – heilbrigðiskröfur til fiskara

Samtök fyrirtækja í sjávarútvegi (hér eftir samtökin) hafa tekið til umsagnar reglugerðardrög þar sem ætlunin er að innleiða reglur um heilbrigðiskröfur sem gerðar verða til fiskara, sbr. mál nr. 258/2002 í samráðsgátt stjórnvalda.

Samtökin leggja ríka áherslu á að frekara svigrúm verði veitt og fiskurum þannig veitt ráðrúm til að afla sér heilbrigðisvottorða fyrir gildistöku reglugerðarinnarinnar, sem áætlað er að verði þann 1. júní 2023. Það er því lagt til að gildistökunni verði frestað til 1. september 2023. Áhyggjur samtakanna snúa m.a. að því að heilsugæslustöðvar geti vart tekið á móti þeim fjölda fiskara sem munu þurfa að afla sér vottorða til að geta rækt sín störf um borð í fiskiskipum fyrir áætlaðan gildistökudag reglugerðarinnar.

Einnig leggja samtökin til að þeir réttindamenn sem starfa um borð í fiskiskipum þurfi ekki að afla sér þessara vottorða að sinni þar sem þeir hafi þegar skilað inn heilbrigðisvottorðum við síðustu endurnýjun þeirra, og uppfylla því þær kröfur sem gerðar eru til heilbrigðis. Með breytingunni yrði létt enn á því álagi sem er fyrir séð að verði við athugun á heilbrigði fiskara, þ.e. öðrum en réttindamönnum. Þeim réttindamönnum yrði því gert að skila inn vottorði til útgerðar og skipstjóra við næstu endurnýjun atvinnuskírteinis viðkomandi réttindamanns.

Í athugasemdum við það frumvarp sem varð að lögum nr. 82/2022, um áhafnir skipa, lögðu samtökin ríka áherslu á að heimila þyrfti rafræna varðveislu skírteina og í því ljósi leggja samtökin til að tilgreint verði að rafræn vistun afrita af heilbrigðisvottorðum fiskara um borð í fiskiskipum teljist fullnægjandi.

Að lokum leggja samtökin til að sú breyting verði gerð að fiskara verði gert kleift að afla sér heilbrigðisvottorðs innan 180 daga frá fyrsta lögskráningardegi um borð í viðkomandi fiskiskipi hjá nýrri útgerð. Upp geta komið tilvik þar sem finna þarf afleysingamenn um borð með skömmum fyrirvara og ljóst að viðkomandi hefur ekki gilt heilbrigðisvottorð á þeim degi. Þá þyrfti einnig að veita sambærilegan frest til endurnýjunar heilbrigðisvottorða. Sama regla myndi því gilda um tilvik af þessum toga líkt og gildir um undanþágu til lögskráningar vegna endurnýjunar skírteinis frá slysavarnarskóla sjómanna. Samtökin telja þetta mikilvægt, einkum í ljósi þess að ekki er stefnt að því að vista þessi gögn eða upplýsingar miðlægt, t.a.m. hjá Samgöngustofu.

Samtökin lýsa sig reiðubúin að eiga samtal við fulltrúa ráðuneytisins og gera nánari grein fyrir sjónarmiðum sínum.

F.h. Samtaka fyrirtækja í sjávarútvegi



Jón Kristinn Sverrisson  
Lögfræðingur